

VENDIM
Nr.897, datë 29.12.2004

PËR DISA NDRYSHIME NË VENDIMIN NR.786, DATË 17.12.1998 TË KËSHILLIT TË
MINISTRAVE “PËR KUALIFIKIMIN SHKENCOR PASUNIVERSITAR DHE
KLASIFIKIMIN E PUNONJËSVE PEDAGOGJIKË E KËRKIMORË”, TË NDRYSHUAR

Në mbështetje të nenit 100 të Kushtetutës dhe të neneve 27 e 37 të ligjit nr.8461, datë 25.2.1999 “Për arsimin e lartë në Republikën e Shqipërisë”, të ndryshuar, me propozimin e Ministrit të Arsimit dhe të Shkencës, Këshilli i Ministrave

VENDOSI:

Në vendimin nr.786, datë 17.12.1998 të Këshillit të Ministrave, të ndryshuar, të bëhen këto ndryshime:

1. Pika 3.8 ndryshohet si më poshtë vijon:

“3.8 Pas miratimit të disertacionit të doktoratës nga juria, disertanti merr gradën “Doktor i shkencave”. Regjistrimi i diplomës bëhet në regjistrin përkatës, pranë sekretarisë së komisionit të kualifikimit shkencor dhe, pas kësaj, nënshkruhet nga dekani dhe rektori i universitetit përkatës.”.

2. Në pikën 4 të bëhen këto ndryshime:

a) Nën-pikat 4.2, 4.2.1, 4.2.2 dhe 4.2.3 ndryshohen si më poshtë vijon:

“4.2 Punonjësit pedagogjiko-shkencorë të shkollave të larta, në varësi nga vendi dhe roli që kanë në veprimtarinë e mësimdhënies e nga kontributi i tyre mësimor e shkencor, klasifikohen si vijon:

4.2.1 “Profesor” (Prof.) emërtohet punonjësi pedagogjiko-shkencor, i brendshëm, i shkollave të larta ose punonjësi pedagogjiko-shkencor, i jashtëm, i rregullt, i këtyre institucioneve, i miratuar zyrtarisht nga organet përkatëse, që ka gradën shkencore “Profesor i asociuar”, të paktën prej pesë vjetësh, dhe që gjatë kësaj periudhe është ose ka qenë:

- titullar lëndësh a grup lëndësh;
- udhëheqës diplomash të shkollave pasuniversitare ose të paktën i një disertacioni;
- autor ose bashkautor kryesor i të paktën një teksti universitar, të miratuar nga fakulteti përkatës ose i një monografie;
- hartues programesh për të paktën një lëndë a cikël lëndësh të veçanta;
- autor artikujsh shkencorë, jo më pak se pesë;
- drejtues studimesh a projekteve shkencore;
- drejtues seksioni, katedre, departamenti ose ekipi kërkimor;
- pjesëmarrës me referate a kumtesa në kongrese apo konferenca shkencore, brenda dhe jashtë vendit, dhe ka botuar artikuj a kumtesa jashtë vendit.

Niveli i punimeve kryesore të kandidatit, të përzgjedhura nga vetë ai, si monografi (tekste) ose, në vend të tyre, artikuj shkencorë, vlerësohet nga dy oponentë, të cilët caktohen nga kryetari i senatit të universitetit ose kryetarët e seksioneve të Akademisë së Shkencave. Në veprat me bashkautorësi oponentët përcaktojnë edhe kontributin e çdo kandidati.

Përjashtime bëhen vetëm me vendim të komisionit të kualifikimit shkencor, por përjashtimet nuk mund të cenojnë afatin kohor të përcaktuar për kërkimin e titullit dhe as rregullin e kapërcimit të shkallëve të vendosura për fitimin e titujve.

4.2.2 “Profesor i asociuar” (Prof.asoc.) emërtohet punonjësi pedagogjiko-shkencor, i brendshëm, i shkollave të larta, ose punonjësi pedagogjiko-shkencor i jashtëm, i rregullt, i këtyre institucioneve, i miratuar zyrtarisht nga organet përkatëse, i cili ka gradën shkencore “Doktor i shkencave”, të paktën prej pesë vjetësh, me përvojë mësimdhënieje prej jo më pak se dhjetë vjetësh në shkollën e lartë, nga të cilat tre vitet e fundit pandërprerje, që zotëron, sipas dëshmisë përkatëse, njërën nga gjuhët kryesore anglisht, frëngjisht a gjermanisht dhe, në rast nevojë, një gjuhë të dytë, të caktuar zyrtarisht nga dekani a drejtori përkatës dhe që është:

- titullar lënde;
- autor ose bashkautor i të paktën një teksti universitar, të miratuar nga fakulteti përkatës, ose

monografie;

- autor i jo më pak se pesë artikujve e kumtesave të botuara, brenda dhe jashtë vendit;
- realizues projektesh a studimesh të rëndësishme shkencore;
- udhëheqës (pas përfundimit të doktoratës) i punimeve të diplomave universitare ose pasuniversitare.

Përgjashtime bëhen vetëm me vendim të komisionit të kualifikimit shkencor, por përgjashtimet nuk mund të cenohen afatin kohor të përcaktuar për kërkimin e titullit.

4.2.3 “Lektor” emërohet punonjësi akademik, i brendshëm, i shkollave të larta, me gradë shkencore “Doktor i shkencave”, që jep leksione, është autor artikujsh shkencorë dhe ka udhëhequr diploma universitare ose pasuniversitare.”.

b) Nënparagrafi 4.3, 4.3.1 dhe 4.3.2 ndryshohen si më poshtë vijon:

“4.3 Punonjësit kërkimorë të institucioneve kërkimore-shkencore dhe punonjësit kërkimorë-shkencorë të shkollave të larta, në varësi nga niveli shkencor dhe kontributi personal, si dhe nga vendi që zënë në veprimtarinë kërkimore-shkencore, klasifikohen:

4.3.1 “Profesor” (Prof.) emërohet punonjësi i brendshëm, kërkimor-shkencor, i institucioneve shkencore ose i shkollave të larta apo bashkëpunëtori i jashtëm, i rregullt, i këtyre institucioneve, i miratuar zyrtarisht nga organet përkatëse, që është:

- “Profesor i asociuar”, prej jo më pak se pesë vjetësh dhe që gjatë kësaj periudhe drejton ose ka drejtuar kërkime në fushën e vet;

- autor ose bashkautor kryesor i të paktën dy monografive;

- autor a bashkautor kryesor i të paktën një monografie dhe një teksti universitar, të miratuar nga fakulteti përkatës;

- autor i të paktën dhjetë artikujve shkencorë, brenda e jashtë vendit;

- udhëheqës i të paktën një disertacioni për doktoratë;

- pjesëmarrës, në mënyrë të vazhdueshme, në veprimtari shkencore, brenda dhe jashtë vendit, me komunikime gojore ose me postera.

Për specialitete të veçanta, në mungesë të monografive dhe të teksteve universitare, duhet të ketë botuar të paktën dhjetë artikuj të tjerë, brenda e jashtë vendit.

Niveli i punimeve kryesore të kandidatit, të përzgjedhura nga vetë ai, si monografi (tekste) ose, në vend të tyre, artikuj shkencorë, vlerësohet nga dy oponentë, të cilët caktohen nga kryetari i senatit të universitetit ose kryetarët e seksioneve të Akademisë së Shkencave. Në veprat me bashkautorësi, oponentët përcaktojnë edhe kontributin e çdo kandidati.

Përgjashtime bëhen vetëm me vendim të komisionit të kualifikimit shkencor, por përgjashtimet nuk mund të cenohen afatin kohor të përcaktuar për kërkimin e titullit dhe as rregullin e kapërcimit të shkallëve të vendosura për fitimin e titujve.

4.3.2 “Profesor i asociuar” (Prof.asoc.) emërohet punonjësi kërkimor-shkencor i institucioneve shkencore apo i shkollave të larta ose bashkëpunëtori i jashtëm, i rregullt, i këtyre institucioneve, i miratuar zyrtarisht nga organet përkatëse, i cili ka gradën shkencore “Doktor i shkencave”, prej jo më pak se pesë vjetësh, e që zotëron, me dëshmi përkatëse, njërën nga gjuhët kryesore anglisht, frëngjisht a gjermanisht dhe, në rast nevojë, një gjuhë të dytë, të caktuar zyrtarisht nga dekani a drejtori përkatës, dhe që ka:

- përvojë kërkimore, jo më pak se dhjetë vjet, nga të cilat tri vitet e fundit pandërprerje;

- botuar, si autor a bashkautor, të paktën një monografi ose një tekst universitar, të miratuar nga fakulteti përkatës;

- botuar të paktën pesë artikuj, si dhe kumtesa shkencore, nga të cilat dy jashtë vendit;

- marrë pjesë në realizimin e projekteve të rëndësishme kërkimore;

- kontribuar në shkollën pasuniversitare, nëse ka të tilla;

- marrë pjesë në konferenca shkencore, brenda ose jashtë vendit, me kumtesa ose postera.

Për specialitete të veçanta, në mungesë të monografisë a të tekstit universitar, duhet të ketë botuar dhjetë artikuj ose kumtesa shkencore, nga të cilat tre jashtë vendit.

Përgjashtime bëhen vetëm me vendim të komisionit të kualifikimit shkencor, por përgjashtimet nuk mund të cenohen afatin kohor të përcaktuar për kërkimin e titullit.”.

c) Në nënparagrafi 4.3.3 dhe 4.3.4, fjala “... emërohet. . .” zëvendësohet me “... është...”.

ç) Nënparagrafi 4.4, 4.5, 4.6 dhe 4.7 ndryshohen si më poshtë vijon:

“4.4 Veprimtaria mësimdhënëse dhe kërkimore e kandidatëve për titullin “Profesor” dhe “Profesor i asociuar” shqyrtohet publikisht në mbledhjen e departamentit. Vendimi merret me votim të fshehtë dhe i përcillet këshillit të fakultetit përkatës, i cili, gjithashtu, vendos me votim të fshehtë. Nëse këshilli i fakultetit voton pro kandidatit, me të paktën një të tretën e votave të anëtarëve të pranishëm, dosja i dërgohet senatit të shkollës së lartë. Senati i shkollës së lartë, vendos me votim të fshehtë dhe ia përcjell dosjen komisionit të kualifikimit shkencor, në rast se votojnë pro kandidatit të paktën një e treta e anëtarëve të pranishëm. Komisioni i kualifikimit shkencor merr vendimin përfundimtar, për çdo kandidat, me votim të fshehtë.

4.5. Veprimtaria kërkimore-shkencore e kandidatëve për titullin “Profesor” dhe “Profesor i asociuar” shqyrtohet publikisht në mbledhjen e departamentit a të seksionit shkencor. Vendimi, i marrë me votim të fshehtë, i përcillet këshillit shkencor të institucionit përkatës, i cili, gjithashtu, vendos me votim të fshehtë. Nëse këshilli shkencor voton pro kandidatit, me të paktën një të tretën e votave të anëtarëve të pranishëm, dosja i dërgohet seksionit përkatës të Akademisë së Shkencave. Seksioni i Akademisë së Shkencave vendos me votim të fshehtë dhe ia përcjell dosjen komisionit të kualifikimit shkencor, nëse votojnë pro kandidatit, të paktën një e treta e anëtarëve të pranishëm. Komisioni i kualifikimit shkencor merr vendimin përfundimtar, për çdo kandidat, me votim të fshehtë.

4.6 Veprimtaria kërkimore-shkencore e kandidatëve për titullin “Profesor” dhe “Profesor i asociuar”, që punojnë në një institucion kërkimor, në varësi të një dikasteri, shqyrtohet publikisht në mbledhjen e departamentit a të seksionit shkencor. Vendimi, i marrë me votim të fshehtë, i përcillet këshillit shkencor të institucionit përkatës, i cili, gjithashtu, vendos me votim të fshehtë. Nëse këshilli shkencor voton pro kandidatit, me të paktën një të tretën e votave të anëtarëve të pranishëm, dosja i dërgohet senatit të universitetit përkatës ose seksionit përkatës të Akademisë së Shkencave. Senati i universitetit ose seksioni i Akademisë së Shkencave vendos me votim të fshehtë dhe ia përcjell dosjen komisionit të kualifikimit shkencor, nëse votojnë pro kandidatit, të paktën një e treta e anëtarëve të pranishëm. Komisioni i kualifikimit shkencor merr vendimin përfundimtar, për çdo kandidat, me votim të fshehtë.

4.7 Në çdo rast, kur kandidati për titullin “Profesor” apo “Profesor i asociuar” nuk është miratuar nga fakulteti ose institucioni përkatës, nga senati i universitetit përkatës a seksioni përkatës i Akademisë së Shkencave apo komisioni i kualifikimit shkencor, me vendim të formës së prerë, ai ka të drejtë ta përsërisë kërkesën, pasi të kenë kaluar:

- 3 vjet nga data e vendimit për titullin “Profesor”;
- 2 vjet nga data e vendimit për titullin “Profesor i asociuar”.

Në të gjitha rastet, procedurat e shqyrtimit nisin nga hallka bazë (departamenti a sektori shkencor).”.

Ky vendim hyn në fuqi pas botimit në Fletoren Zyrtare.

KRYEMINISTRI
Fatos Nano